



# Skina di Ruthy

## Cu nan bunita parada di sombre... Celebrando aniversario di Grupo Flor Bini Bini

Skirbi pa Ruthy "Lady Ruth" Vrieswijk-Bergen

Cu hopi alegria Lady Ruth a bishita nan e mainta bunita ey den Centro di Bario Noord, anto a keda celebra hunto cu nan. Ora a yega cas mas laat a sinta traha e relato cu awor no por hanya mas riba computer, warda talbez den un otro programa den e computer. Pero, manera priminti na e damanan bunita den e grupo mencionada, cu a celebra nan 25 of ta mas anjanan di existencia, cu hende muhenan dinamico, talentoso y hopi inspira cu regularmente nan actividadnan yen di alegria, ata aki algo bunita di Lady Ruth su curason. Mi ta corda, cu e dushi mainta aki Nelson Sprock a deleita tur presente cu su dushi musica di caha di orgel y cu Lady Ruth a pidi y a hanya e oportunidad di recita algun poema cu tambe a cai na agrado di



e publico. Meymey di tur e damanan di Noord, cu nan bunita sombre bisti, na maneranan artistico y unico decora....tawatatin tambe un mesa na unda un grupo di caballeros tawata sinta. Y nos por corda, cu nos a baila un wals cu e esposo di un amiga di e team di volley di Jufr. Chita di anjanan pasa. Sra. Greta Posner di Guiselle Department Store tawata e maestra di ceremonia y den e hurado pa scoge e sombrenan ganador nos a mira e.o. Sr. Frank Croes di dept. di cultura. Y....cu Lady Ruth a regala un di e ganadornan su buki cu col-

leccion di poesia. Danki na tur cu a traha cu amor den e direktiva pa hopi anja....na tur cu a yuda organisa y realiza e dushi celebracion aki, na tur cu a sirbi y atende esnan presente cu cos dushi di come y bebe. E parada bunita di e damanan nechi y elegante aki a sali for di dilanti Guiselle Department Store bay Centro di Bario Noord, na unda nan a modela dilanti hurado y ganadornan a ricibi un bunita premio.



Segun mi a comprende, ta Lady Glenda Gil a lanta e bunita grupo aki, cu mas y mas exito den tur nan bunita actividad pa asina hopi anjas. Nos pabien di curason na direktiva y miembronan di anjanan pasa te cu awor cu e deseo pa sigui celebra hopi mas anja di existencia. Nos ta dorna e relato aki cu varios bunita potret pa nos lectornan mes sinti e dushi ambiente y alegria di e dushi dia ey, cu sigur ta



den curason di hopi. Pasa un dushi dia yen di alegria, cu hopi gradicimento na curason pa e bunita regalo precioso di un otro dia yen di oportunidadnan nobo, momentonan special cu ta toca curason di nos dushi hendenan di Aruba cu ta stima nan isla....cu ta stima famia....y cu ta bon ehempelnan positivo cu pasenshi y respet pa nan mes y pa otro. God bless !!!

